



REPÚBLIKA DEMOKRÁTICA TIMOR-LESTE
SEKRETARIA ESTADU BA PROMOSAUN IGUALDADE

**DISKURSU S.E. SEKRETARIA ESTADU BA PROMOSAUN IGUALDADE (SEPI)
SELEBRASAUN LORON INTERNASIONAL BA REDUSAUN RISKU DEZASTRE
12 OUTUBRU 2012**

Hau nia respeitu ba:

Vise Ministru Solidaridade Sosiál Sr. Jacinto Rigoberto,

Reprezentante Espesiál Sekretariu Jerál ONU iha Timor-Leste Sr. Finn Reske-Nielsen,

Hau hakarak nota katak iha eventu horseik 11 Outubru ne'ebé komemora Loron Internasionál ba Labarik Feto no ohin ita komemora Loron Internasionál ba Redusaun Dezastre ne'ebé normalmente kada tinan ita selebra iha loron 13 Outubru. Ita bele harmoniza eventu rua ne'e liu husi tema "*Involvementu Feto no Foin-sa'e Feto sira iha Redusaun Risku Dezastre*" no hau mós hakarak atu hatete iha ne'e katak iha Segunda-Feira 15 Outubru ne'ebé mai, ita sei selebra Loron Internasionál Feto Rurál iha Distritu Lautem.

Hau hatene katak tema ba Loron Internasionál Redusaun Dezasrte mak feto no labarik feto ne'ebé la hetan konsiderasaun ne'ebé bele permite sira atu bele rekopera. Asuntu hirak ne'ebé sei deskute mak ko'alia liu kona-ba redusaun risku dezastre ne'ebé liga ho partisipasaun feto no foin-sa'e feto sira iha jestaun ambiente no rekursu naturais; governasaun; jestaun ba planu hodi utiliza rai no planu ekonomia no sosial.

Iha situasaun jerál, comunidade sira iha papel importante iha redusaun risku dezastre no tinan ida ne'e foka liu ba iha grupu feto no labarik feto sira. Dala ruma wainhira ita ko'alia kona-ba jestaun rekursu naturais feto nia papel sempre la hetan konsiderasaun, tanba normalmente halo redusaun ba risku dezastre sempre domina husi mane sira. Maske nune'e feto asume papel kritiku hodi proteje ita nia ambiente tanba liga ho sira

nia papel domestika (hanesan kuru bee, hili ai) ne'ebé liga direktamente ho ambiente. Ita mos rekoñese katak tradisionalmente feto sira mak iha papel importante reprodutivu nian. Asuntu hirak ne'e nesesáriu tebes ba família sira nia moris diak. Loos duni, feto barak iha momentu ne'e tama ona iha área servisu no hau sei esplika liután tuir mai.

Hare ba situaun ida ne'e, ita la bele atu kritika feto sira hodi tesi ai ou ba kuru bee hodi sustenta sira nia família maibe buat ne'ebé importante liu mak ema ida-idak, feto no mane, kompriende asuntu sustentabilidade no alternativu husi rekursu enerjia nian ne'ebé disponivel no bele fasil atu asesu. Relasiona ho asuntu kuru bee ita mós prezisa haree oinsa kona-ba saneamentu ba família nia moris diak, liu-liu ema ida-idak prezisa hatene no kompriende didiak importánsia husi higiene ninia. Iha faktus ita bele haree iha loron 15 Outubru hanesan Loron Mundiál Fase Liman ho Sabaun.

Karik ita bo'ot sira admira tanba sa mak hau ko'alia liu kona-ba feto iha área doméstika ne'ebé liga ho servisu hanesan hili ai, kuru bee no saneamentu ninian. Tanba feto mak hanesan ema ne'ebé sei sai vítima husi dezastre tanba sira mak hela iha uma liu-liu sira ne'ebé hela iha área rural no iha kondisaun ne'ebé vulneravel tebes liga ba la iha asesu ba asisténsia sosiál, informasaun no meius subsistensia. Hau bele foti ijemplu ida hanesan wainhira mota tun, fo'er sira tun no nakonu sei afeta ba família ninia saúde. Iha mós ijemplu seluk hanesan sunu ai laran, iha asaun ruma hanesan rezisténsia dezastre uma nian, ne'ebé ita foti hodi prevene ka redus estragus ba ita nia uma no fó seguransa ba ita nia família.

Agora hau ko'alia kona-ba feto iha setór formál intermus de jestaun ambiente ne'ebé sustentavel. Iha tinan sira ne'ebé liu ona, ita iha Prioridade Nasionál. Iha 2011 iha metas kona-ba jestaun ai-laran ne'ebé sustentavel no eficiente. Iha tarjetu ba treinamentu seguransa ba floresta no ofisiais ambiente ema 200 no iha espetativu feto 15 no realidade hatudu katak feto nia numeru sa'e liu kedas ba 20. Ita bele konsidera katak ita nia espetativu ba número feto atinji duni maibé ida ne'e sei 10% deit. Hau iha esperansa ba futuru katak feto no feto foin-sa'e sei hetan forsa atu partisipa masimu liután hodi

halo protesau ba ambiente no kontribui ba antisipasaun komunidadade hodi hasoru dezastre.

Ikus liu hau hakarak atu ható'o hau nia agradesementu no apresiasaun ba ita bo'ot sira nia inisiativu hodi konvida hau atu mai ható'o hau nia hanoin iha momentu importante ida hanesan ohin ne'e.

Obrigada barak ba ita bo'ot sira nia atensaun.